



Komisija za očuvanje nacionalnih spomenika, na osnovu člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 4. do 11. septembra 2006. godine, donijela je

ODLUKU

I.

Historijska građevina – Gradska vijećnica u Sarajevu proglašava se nacionalnim spomenikom Bosne i Hercegovine (u daljnjem tekstu: nacionalni spomenik).

Nacionalni spomenik se nalazi na lokaciji koja obuhvata k.č. broj 225 upisanoj u posjedovni list broj 438, k.o. Sarajevo I (novi premjer), što odgovara k.č. broj 97 upisanoj u z.k. uložak broj XCVIII/19, k.o. Sarajevo (stari premjer), općina Stari grad, Federacija Bosne i Hercegovine, Bosna i Hercegovina.

Na nacionalni spomenik se primjenjuju mjere zaštite i rehabilitacije utvrđene Zakonom o provođenju odluka Komisije za zaštitu nacionalnih spomenika uspostavljene prema Aneksu 8. Općeg okvirnog sporazuma za mir u Bosni i Hercegovini (»Službene novine Federacije BiH«, br. 2/02, 27/02 i 6/04).

II.

Vlada Federacije Bosne i Hercegovine (u daljnjem tekstu: Vlada Federacije) dužna je da osigura pravne, naučne, tehničke, administrativne i finansijske mjere za zaštitu, konzervaciju, restauraciju i prezentaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će tehničke uvjete i osigurati finansijska sredstva za izradu i postavljanje informacione table sa osnovnim podacima o spomeniku i odluci o proglašenju dobra nacionalnim spomenikom.

III.

S ciljem trajne zaštite nacionalnog spomenika, na prostoru definiranom u tački I stav 2. ove odluke, utvrđuju se sljedeće mjere zaštite:

1. Dopušteni su samo konzervatorsko-restauratorski, radovi statičko-konstruktivne sanacije, radovi rekonstrukcije nedostajućih dijelova i radovi na prezentaciji nacionalnog spomenika na osnovu originalne projektne dokumentacije, uz odobrenje federalnog ministarstva nadležnog za prostorno uređenje i stručno nadziranje službe zaštite naslijeđa na nivou Federacije Bosne i Hercegovine;

2. Prije izvođenja bilo kakvih radova na objektu, potrebno je izvršiti tehnički prijem realiziranih radova:

- stabilizacije konstruktivnog sklopa zidanih konstrukcija,

- rekonstrukcije krovišta sa izvedbom gromobranske instalacije,
- sanacije čelične kupole i spuštenog stropa sa obnovom staklenog pokrova,
- radovi rekonstrukcije aule.

3. Vlada Federacije BiH dužna je da osigura izradu odgovarajuće projektne dokumentacije, na osnovu izvršenih istraživačkih radova, a koja će obuhvatati:

- konstruktivnu sanaciju i stabilizaciju: podrumskih zidova i stubova; kupola, podne ploče prizemlja, oslonca dekorativnih elemenata na sljemenu krovišta, unutrašnjih stepeništa, vanjskih kamenih stepeništa
- restauraciju fasada;
- restauraciju unutrašnjih prostora i njihovu adaptaciju javnoj – administrativnoj ili kulturnoj namjeni;
- restauraciju gipsanih dekoracija i slikanih dekoracija.

4. Prilikom konzervatorsko-restauratorskih radova na objektu obavezno sačuvati ili vratiti njegov izvorni izgled u pogledu obrade arhitektonskih detalja, boje zidova, tretmana otvora i tretmana fasada;

5. Prilikom konzervatorsko-restauratorskih radova koristiti izvorne materijale, primjenjivati izvorne metode obrade materijala i vezne elemente, i njihove ugradnje, u što je moguće većoj mjeri. Svi sačuvani fragmenti biće ispitani i ponovno ugrađeni u objekat.

6. U neposrednoj kontaktnoj zoni nacionalnog spomenika nije dozvoljeno parkiranje vozila.

IV.

Stavljaju se izvan snage svi provedbeni i razvojni prostorno-planski akti koji su suprotnosti sa odredbama ove odluke.

V.

Svako, a posebno nadležni organi Federacije Bosne i Hercegovine, kantona, gradske i općinske službe suzdržat će se od poduzimanja bilo kakvih radnji koje mogu da oštete nacionalni spomenik ili dovedu u pitanje njegovu zaštitu.

VI.

Ova odluka dostavit će se Vladi Federacije, federalnom ministarstvu nadležnom za prostorno uređenje, nadležnoj službi zaštite naslijeđa na nivou Federacije Bosne i Hercegovine i općinskom organu uprave nadležnom za poslove urbanizma i katastra, radi provođenja mjera utvrđenih u tač. II - V ove odluke i nadležnom općinskom sudu radi upisa u zemljišne knjige.

VII.

Sastavni dio ove odluke je obrazloženje sa pratećom dokumentacijom, koje je dostupno na uvid zainteresiranim licima u prostorijama i na web-stranici Komisije (<http://www.aneks8komisija.com.ba>).

VIII.

Prema članu V, stav 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

IX.

Danom donošenja ove odluke, sa Privremene liste nacionalnih spomenika Bosne i Hercegovine (»Službeni glasnik BiH«, broj 33/02, »Službeni glasnik Republike Srpske«, broj 79/02, »Službene novine Federacije BiH«, broj 59/02 i »Službeni glasnik Brčko Distrikta BiH«, broj 4/03) briše se nacionalni spomenik upisan pod rednim brojem 510.

X.

Ova odluka stupa na snagu danom donošenja i objavit će se u »Službenom glasniku BiH«.

Ovu odluku Komisija je donijela u sljedećem sastavu: Zeynep Ahunbay, Amra Hadžimuhamedović, Dubravko Lovrenović, Ljiljana Ševo i Tina Wik.

Predsjedavajuća Komisije

Amra Hadžimuhamedović

Broj: 06.1-2-270/05-13
5. septembra 2006. godine
Sarajevo